

Gulan, Pûşper 2010



YAŞA e.V.

Kurdish Centre for
Legal Studies and
Consultancy

Kurdisches Zentrum
für juristische Studien
und Beratungen

Navenda kurdî
ji bo lêkolîn û
rawêjkarîya yasayî

المركز الكردي للدراسات
والاستشارات القانونية

YASA e.V.
Postfach 7624
53076 Bonn
www.yasa-online.org

Mehmûd Sefo

Naverok:

- **Ji endamekî serkirdayetiya Partiya Çep re salek zindan**
- **Dadgeha leşkerî li Helebê zindan li sê çalakvanên kurd birî**
- **Kuştina leşkerên kurd di rewşine nepend de hên berdewam e**
- **Xwendekarekî kurd ji bo dadgeha leşkerî hate guhastin**
- **Li navçeya Kobanî Kurd bi koman hatin binçavkirin**
- **Hinek xwendekarên kurd ji ber seyranekê hatin girtin**
- **Elmanya dîsa dixwaze penaberekî kurd vegeerîne Sûriyê**

Ji endamekî serkirdayetiya Partiya Çep re salek zindan

Di roja Yekşemê de 20.06.2010an dadwerê tek ê leşkerî li bajarê Qamişlo salek zindan li endamê nivîsgeha ramiyarî ya Partiya Çep a Kurd li Sûriyê **Mehmûd Sefo** birî. **Mehmûd Sefo** bi arandina kînên nijadperesetî û zavî û endamtiya komeleyeke nihênî û ne qeydkirî, ku tê de serkirde ye, hate tewanbarkirin. Tê zanîn, ku revdeya ewlekariya ramiyarî li navçeya Dêrikê-Parêzgeha Hesîçayê ew di 28.03.2010an de binçav kiri bû.

Dadgeha leşkerî li Helebê zindan li sê çalakvanên kurd birî

Di 15.06.2010an de dadgeha tewankariyan a leşkerî du sal û nîv zindan li du girtiyên siyasî birîn. Ew jî ev in: **Dilşêr Xetûb Ehmed** ji bajarê Qamişlo û **Lorans Hecir** ji bajarê Amûdê. Herdû bi endamtiya rêxistineke siyasî, ku armanca wê dabeşkirina beşekî ji xaka Sûriyê û gihandina wî bi komareke biyanî ve, hatin tewanbarkirin. Herwiha li girtiyê siyem **Fewaz Mihyedîn**, ku ji bajarê Amûdê ye, salek û sê meh zindan hate birîn. Ew jî bi endamtiya rêxistineke siyasî hate tawanbarkirin.

Kuştina leşkerên kurd di rewşine nepend de hên berdewam e

Ji beriya çend salan ve leşkerên kurd di dema pêkanîna erkê leşkeriyê de li Sûriyê di rewşine nepend de tîn kuştin û tu vepirsîn di derbarê vê kêşeyê de nabin. Ji destpêka sala 2010an ve û heya aniha pênc leşkerên kurd hatine kuştin:

-Necmedîn Hesen Dalo, di sala 1991an de, gundê Hêkçe, li Efrînê ji dayik bûye. Cenekî wî di 07.06.2010an de gihaye malbata wî. Ewî erkê leşkeriyê di koma Ên Îsa de li bajarê Reqayê pêk tanî û dora sê meh borandi bûn. Ji malbata wî hate ragihandin, ku ewî di dema çavdêriya şevî de xwe kuştîye.

-Mihemed Nezîr Dêro, di sala 1981an de li gundê Zor Mixor, li Kobanî ji dayik bûye. Cenekê wî di 30.05.2010an de gihaye malbata wî. Ewî erkê leşkeriyê li navçeya Hercelê li Şamê pêk tanî. Ew di destpêka Gulana 2010an de tev li artêşê bû bû û piştî 27 rojan ji kursê amadekirinê jiyana xwe ji dest da bû. Ji malbata wî hate ragihandin, ku dilê wî rawestiya û êdî jiyana xwe ji dest da. Lê piştî ku malbata wî li cenekê wî nêrî, şûna lêdan û azarîkîrnê xuya kir, nexasim li ser lêv û serê wî.

-Xebat Elîko, di sala 1991an de li Efrînê ji dayik bûye. Di 07.05.2010an de cenekê wî gihaye malbata wî. Ewî erkê leşkeriyê li bargeheke leşkeran li navçeya Bokmal li ser sînoren Sûriyê û Îraqê pêk tanî. Hevalên wî ragihandin, ku di dema berdana agir de gule li herdû aliyên rast û çepê yên sînga wî ketine û herwiha li destê wî jî û ji ber birînên xwe jiyana xwe ji dest daye. Hate ragihandin, ku ew di bin kontrol û çavdêriyek mezin ji hêzên ewlekariyê hate binaxkirin. Herwiha ne dê, ne jî bavê wî ew dît û rê ji wan re venebû, da ku pîrsa sedemên kuştina wî bikin.

-Osman Mistefa Bozan, di sala 1989an de li gundê Qilêç Wêranê li Kobanî ji dayik bûye û di nivê Avrêla 2010an de jiyana xwe ji dest daye.

-Îsa Xelef Begê, di sala 1991an de li bajarê Kobanî ji dayik bûye û di 10.01.2010an de cenekê wî gihaye malbata wî.

Xwendekarekî kurd ji bo dadgeha leşkerî hate guhastin

Hate ragihandin, ku xwendekarê beşê rojnamevaniyê **Ridwan Reşîd Osman** di 20.07.2010an de ji bo dadgeha leşkerî li bajarê Reqayê hate guhastin. Ew di sala 1987an de li bajarê Girê Spî ji dayik bûye û rojnamevaniyê li zanîngeha Şamê dixwîne.

Hinek xwendekarên kurd ji ber seyranekê hatin girtin

Di 09.04.2010an de ewlekariya siyasî li bajarê Şamê hinek xwendekarên kurd di zanîngeha Şamê de binçav kirin. Hate ragihandin, ku ji ber amadekirina wan ji seyranekê re li parêzgeha Siwêda, ew hatine girtin. Xwendekarên ku hatine girtin, ev in:

Fedîr Celal Keleş: Sala çarem e di beşê wêjeya Ingilîzî de.

Fîraz Ebdil Ezîz Reşo: Sala çarem e di beşê wêjeya Ingilîzî de.

Newaf Cemîl Xelo: Sala çarem e di beşê wêjeya Erebî de.

Yasîn Ebdil Hemîd: Sala çarem e di beşê Felsefeyê de.

Ebdela Nezîr Mihemed: Sala siyem e di beşê Felsefeyê de.

Hêvîdar Elî Mistefa: Sala çarem e di zankoya Perwerdekirinê de.

Kanîwar Derwîş: Sala çarem e di beşê Felsefeyê de.

Tîrêj Mîrza: Sala siyem e di beşê Felsefeyê de.

Li navçeya Kobanî Kurd bi koman hatin binçavkirin

Di mehên Avrêl, Gulan û Pûşpera 2010an de hêzên ewlekariyê li navçeya Kobanî bi koman welatîyên kurd binçav kirin. Di Avrêlê de dora bîst Kurd hatin girtin. Ew jî ev in: **Luqman Mistefa Nasan, Xelîl Osman Şêxo, Cerah Dawûd Şêxo, Salih Mihemed Bozan, Mihemed Elî Hac Evdo, Adil Xelîl Kero, Elî Mistefa, Derwîş Ebdil Qadîr, Enwer Mistê, Mihemedê Îsê, Cuma Mihemed Îsê, Iskender Mihemed Îsê, Mihemed Mehmûd Mislim, Mistefa Mehmûs Mislim, Yaqûb Mehmûd Mislim, Hecî Ismaîl, Mihemed Ismaîl, Seyda Mehmûd û Ismet Şêx Hesen.**

Herwiha di 15.02.2010an de **Ebdela Mihemed Îso**, ku mafnasiyê li Misrê dixwîne, hate

binçavkirin. Û di 05.03.2010an de **Bozan Bozan Ebdil Qadir û Wehîd Xelîl Yûsif** jî hatin binçavkirin.

Elmanya dîsa dixwaze penaberekî kurd vegeêrîne Sûriyê

Malbata penaberê kurd ê sûtî **Farûq Îsa** ragihand, ku asayîşên elman **Farûq** di 21.06.2010an de li kargêriya biyaniyan li bajarê Wilhelmshaven binçav kirin. Ewê dixwest li wir dema kaxeta mayîna xwe ya sê mehane li Elmanya carek din dirêj bike, lê bi dest wê ne ket. Asayîşên elman ew birin dadgeha bajêr û li wir biryar di derheqê wê de derket û ew jî bo zindana Langenhagen nêzîkî bajarê Hannoverê hate guhastin, da ku paşê wê vegeêrin li Sûriyê. Hate ragihandin, ku ew dê di 18 an 20.08.2010an de bête vegernadin û heya hingê jî dê girtî bimîne. Welatîyê kurd **Farûq Îsa** di sala 2004an de koçberî Elmanya bû bû, lê mafê rûniştinê bi dest wê ne keti bû.
